

ECONOMIA

Savognin: Uffer SA sa participescha ad en project d'integraziun dall'ARGO

Partenaris cun gronda tgapientscha



Integrar persungas cun en impedimaint aint igl process da lavour da mintga de chegl lessan betg angal igls dus omens dall'ARGO, mabagn er chels tgi pon luvrar sainza handicaps. (da san.) Giusep Arpagaus, manader da project, Mathias Huber, impedia, Ramon Collet, legnamer Uffer SA e Claudio Elsa, tgirader ARGO.

● **G.N.S. Integrar persungas cun en impedimaint ainten la veta professionala da mintga de. Chegl è igl intent dad en project dall'ARGO. Mano vign chel cun Giusep Arpagaus bagn dad en Sursilvan, tgi ò però er rieischs an Surmeir. Agl project sa participescha dantant er Enrico Uffer da Savognin cun sia interpresa.**

«Integrar antras experientschas e far experientschas», uscheia sa nomna igl project dall'ARGO per l'integraziun da persungas cun impedimaints aint igl mond da lavour da mintga de. Chegl è betg schi simpel e percheigl ò dall'ARGO surdo a Giusep Arpagaus da Ruschein l'incumbensa da tschar-tger menaschis e cunzont patrungs tgi on tgapientschas per persungas cun impedimaints e surtot er travagls tgi èn dalunga stoss persiva da sa participar a chel project. Scu gio menziuno soura è Giusep Arpagaus igl om digl rom per igls contacts tranter las persungas cun en impedimaint spirtal u corporal e cun igls patrungs digls travagls tgi èn da preschaint anmez la fasa da realizzaziun digl project. Igl Sursilvan ò ena relaziun pi strètga cun Surses, cun esser stada sia mamma Genoveva Arpagaus-Cotti da Sur.

Ena sfida per tots

Scu er tar otras tgossas segna betg ple la confederaziun per la finanziaziun d'instituziuns per l'integraziun da persungas cun impedimaint. Siva digl 2008 screiva la lescha federala davart instituziuns per la promoziun dall'integraziun da persungas invalidas dantant avant, tgi mintga cantun vegia l'incarica da saveir garanteir a tots ena purscheida d'instituziuns tgi corresponda a moda adequatta a lour basigns. Igl cantun Grischn dispona dantant betg sez dall'infrastructura necessaria per adempier chegl uscheia tgi igl cantun è aviso a partenaris scu l'ARGO. Igl cantun ò incumbenso la fundaziun tgi s'anagscha sen ples camps per persunags cun impedimaints spirtals e corporals da procurar per l'integraziun sociala e professionala da chellas donnas e da chels omens invalids. L'ARGO duess er porscher la tgira ed igl sustign da persungas cun impedimaints antras porscher posts d'abitar schurmageas e da lavour. Sainza dubi ins dastga deir tgi l'ARGO fò chegl exemplaric ed ossa cuagl project «integrar antras experientschas e far experientschas» è la fundaziun sen la dretga veia da procurar tgi persungas cun en impedimaint on

eventual l'ocasiun da far aint igl avignier ena amprendissadi scursania u schiglio luvrar parzial ainten en travagl.

Tschintg travagls ed egn da chels è la firma Uffer SA

Agl project noua tgi vo da far las ampremas experientschas cun persungas invalidas e noua tgi vo da mussar a chellas en nov ambientaint da lavour sa participeschan tschintg menaschis. Chegl èn dus

hotels, en affar d'orticultura, en travagl spezialiso per cabels e cun l'impresa Uffer SA da Savognin er ena lennareia. Tar chel project vogl però er da redutgier la retignientscha anvers ena persunga cun en tschert basigns da sustign. Ansomma nigns problems cun igls treis omens cun impedimaint on gia Marcel Plaz e Ramon Collet, igls dus legnamers dalla firma Uffer SA, l'emda passada. Chels dus deis tgi igls treis omens dall'ARGO on luvro aint igl travagl a Savognin èn els nias sustignias da Claudio Elsa, tgi canoscha igls cumpogns digl luvratori a Casti. Scu ena buna tgossa titulescha igl patrung Enrico Uffer chel project dall'ARGO. Per l'egna ins possa sustignier l'instituziun tgi seia ena impurtanta sen chel camp e per l'otra ins veia er quant tgi duvress anc per integrar persunags cun impedimaint aint igl process da lavour da mintga de. Enrico Uffer dei er tgi igl project seia da gronda valeta per tots dus partenaris e cunzont er per igls luvrants tgi vegian cotras er da piglier risguard sen las persungas invalidas. Enrico Uffer, igl purtader digl premi innovativ 2012 digls impersaris grischuns vei an mintga cass bler bung ve da chel project. Chegl conferma tgi el è er an chel senn, vot deir chegl tgi pertotga igl camp social, fitg avert.



Igls duevels cunsegls da Marcel Plaz (san.), legnamer Uffer SA per David Plattner, tgi è impedia.